

Na osnovu člana 39. i 40. Statuta Nogometnog/Fudbalskog saveza Bosne i Hercegovine, a na prijedlog Komiteta za takmičenje NS/FS BiH, Komitet za hitnost NS/FS BiH, na sjednici održanoj 23.07. 2026. godine u Sarajevu, d o n o s i

PROPOZICIJE ZA NOGOMETNI/FUDBALSKI SUPERKUP BiH 2026

OPĆE ODREDBE

Član 1.

Utakmica za nogometni/fudbalski Superkup BiH (dalje u tekstu: Superkup) stalno je takmičenje u Bosni i Hercegovini. Utakmicu Superkupa igraju prvak WWIN lige i pobjednik nogometnog/fudbalskog Kupa BiH.

Ovim Propozicijama bliže se uređuju pravila za organizaciju utakmice, uslovi po kojima se utakmica održava, organi koji vode takmičenje, uređuju se finansijska pitanja, kao i druga pitanja koja se odnose na organizaciju utakmice. Na odigravanje utakmice Superkupa odgovarajuće se primjenjuju i odredbe Propozicija WWIN lige BiH i završnice nogometnog/fudbalskog Kupa BiH ukoliko pojedine odredbe nisu određene ovim Propozicijama.

Takmičenjem Superkupa BiH rukovodi Komitet za takmičenje NS/FS BiH u saradnji sa Sektorom za takmičenje, suđenje i događaje NS/FS BiH.

Član 2.

Utakmica se u pravilu igra neposredno uoči početka takmičenja za prvenstvo i kup u novoj takmičarskoj sezoni ili nakon završetka jesenskog dijela prvenstva, a datum se utvrđuje kalendarom takmičenja. Izuzetno utakmica se može odigrati najkasnije 30 dana prije završetka proljećnog dijela prvenstva.

Utakmica se igra na terenu pobjednika prvenstva dana 02.08.2026. godine u satnici koju odredi nosioc TV prava.

Izuzetno, utakmica se prema posebnoj odluci Izvršnog odbora NS/FS BiH može igrati na neutralnom terenu na području nekog drugog nacionalnog nogometnog saveza člana FIFA-e. Sastavni dio takve odluke su i prava i obaveze klubova posebno u dijelu finansija.

UTVRĐIVANJE PLASMANA

Član 3.

Utakmica za Superkup odigrava se po jednostrukom kup sistemu. Pobjednik utakmice je ekipa koja postigne više pogodaka. Ako se po isteku redovnog dijela (90 minuta) utakmica završi nerješeno, pobjednička ekipa bit će utvrđena izvođenjem jedanaesteraca, na način utvrđen uputstvima Međunarodnog BORD-a.

PRAVO NASTUPA IGRAČA

Član 4.

Klubovi učesnici Superkupa mogu nastupiti samo s igračima koji su pravilno registrovani i koji su stekli pravo nastupa na kup i prvenstvenim utakmicama, na dan odigravanja ove utakmice.

U ovom takmičenju mogu nastupiti igrači koji su stekli pravo igranja prema odredbama Pravilnika o registraciji, statusu i transferu igrača NS/FS BiH, ukoliko su navršili 17 godina života, kao i igrači koji su navršili 16 godina, ali sa obavezanim specijalističkim ljekarskim pregledom koji nadležni registracioni savez unosi u COMET, na osnovu dokaza o obavljenom specijalističkom ljekarskom pregledu, dostavljenom od strane kluba, sa jasno naznačenim rokom trajanja istog, a kojim se oglašava sposobnim za nastupanje na utakmicama seniorskog uzrasta.

Na utakmicama nemaju pravo nastupa igrači koji se nalaze pod suspenzijom, vremenskom kaznom zabrane igranja, odnosno igrači koji po posebnim propisima nemaju pravo nastupa.

U zapisniku svaka ekipa mora imati najmanje 3 (tri) igrača mlađa od 21 (dvadesetjedne) godine starosti, a 1 (jedan) od igrača do 21 (dvadesetjedne) godine starosti mora biti u igri cijeli tok utakmice. U suprotnom klub snosi takmičarske i disciplinske posljedice. Ovi igrači moraju biti državljani BiH.

Ukoliko iz igre izlazi igrač mlađi od dvadeset jedne godine (21) starosti i ekipa ostaje bez najmanje jednog (1) igrača mlađeg od dvadeset jedne godine starosti u igru mora ući igrač koji ispunjava ovaj kriterijum kako bi navedeni uslov bio ispunjen. Ukoliko klub nema više igrača koji ispunjavaju ovaj kriterijum, nastavak utakmice igraju sa igračem manje.

Ukoliko ekipa u toku utakmice ostane bez igrača starosti do 21 godine života zbog disciplinske mjere isključenja, nastavlja utakmicu sa igračem manje.

Za takmičarsku sezonu 2026/27, igrači mlađi od 21. godine života smatraju se igrači rođeni 01.01.2005. godine i mlađi.

Pravo nastupa igrača stranih državljana regulisano je odredbama Pravilnika o registraciji, statusu i transferu igrača NS/FS BiH. Klub može imati više registrovanih igrača stranih državljana, s tim što 3 (tri) igrača strana državljana mogu biti upisani u zapisnik sa utakmice i imaju pravo nastupa na jednoj utakmici. U suprotnom, klub snosi takmičarske i disciplinske posljedice.

Stranim državljanima u smislu prava nastupa se ne smatraju igrači koji imaju državljanstvo neke od država koje su se nalazile u sastavu bivše SFRJ (Sjeverna Makedonija, Srbija, Crna Gora, Hrvatska i Slovenija), ali za iste ostaju obaveze u skladu odredbama člana 18. Pravilnika o registracijama klubova i igrača i statusu i transferu igrača NS/FS BiH.

Igraču kojem istekne boravišna dozvola nema pravo nastupa, a ako nastupi takav igrač, klub snosi takmičarske i disciplinske posljedice.

Igrači sa dvojnim državljanstvom ne smatraju se stranim državljanima.

Igrač koji je upisan u zapisnik utakmice, smatra se da na utakmici nije nastupio ukoliko nije ušao u igru.

Član 5.

Na utakmici za Superkupa svaka ekipa u zapisnik mora prijaviti minimalno 20 igrača (u suprotnom snosi disciplinske sankcije), a tokom igre se može izvršiti do pet zamjena, tokom najviše tri prekida igre.

U zapisnik sa utakmice ekipa može prijaviti maksimalno 22 igrača.

Najviše četiri ustupljena igrača mogu nastupati na jednoj utakmici.

OBAVEZE UČESNIKA TAKMIČENJA

Član 6.

Za organizaciju utakmice odgovoran je klub domaćin shodno odgovarajućim zakonskim propisima, odredbama Pravilnika o bezbjednosti na nogometnim/fudbalskim utakmicama i ovih Propozicija.

Klub domaćin isključivo je nadležan za red i bezbjednost prije, tokom i nakon utakmice i bit će pozvan na odgovornost zbog bilo kojeg incidenta te može biti kažnjen u skladu s odredbama Disciplinskog pravilnika NS/FS BiH.

U slučaju nastanka štete, klub domaćin oslobađa Nogometni/Fudbalski savez BiH, svih zahtjeva za naknadu štete nastale organizacijom utakmice.

Klub domaćin obavezan je neovisnoj snimateljskoj kompaniji, koju ovlasti NS/FS BiH, omogućiti adekvatne uvjete za snimanje utakmice s najmanje 3 (tri) kamere, jedna na sredini terena i dvije bočne u visini kaznenog prostora.

Također, TV kompaniji koja vrši direktni prijenos utakmice, osigurati punu bezbjednost za opremu i osoblje, za vrijeme i nakon završetka utakmice, u objektu na stadionu.

Tehničko osoblje zaduženo za pripremu, rad i kontrolu rada led panela klub domaćin je dužan prijaviti delegatu utakmice i obezbjediti im klupske akreditacije radi obavljanja dužnosti.

Klub je dužan označiti prostor za fotografije (iza vrata i sa suprotne strane od tehničkih prostora), koji promjenu položaja mogu vršiti samo u poluvremenu utakmice.

Član 7.

Gostujući klub je obavezan pravovremeno obavijestiti domaći klub o vremenu dolaska u mjesto, odnosno na igralište - stadion odigravanja utakmice.

Klub domaćin je obavezan poduzeti sve potrebne mjere za bezbjednost svih službenih lica utakmice (sudija, delegata, posmatrača suđenja, koordinatora za bezbjednost i gostujuće ekipe), za vrijeme odigravanja utakmice i sve do napuštanja stadiona.

Klub domaćin je obavezan osigurati ljekara i vozilo hitne medicinske pomoći, koje mora biti na stadionu pola sata prije početka utakmice.

Bez pismenog odobrenja nadležne policijske stanice, prisustva pripadnika policije, ljekara, sanitetskog vozila, sanitetskih nosila, redarske službe i vatrogasnog vozila utakmica se neće igrati.

Član 8.

Za odigravanje utakmice Superkupa domaćin obavezan je obezbjediti najmanje sedam (7) ispravnih lopti koje u svemu moraju odgovarati propisima Pravila nogometne igre.

Član 9.

Za vrijeme odigravanja utakmice Superkupa u stadionu, pored terena za igru, u tehničkom prostoru oba kluba moraju se nalaziti lica licencirana od strane NS/FS BiH i koja ispunjavaju kriterije u postupku licenciranja za takmičenje WWIN lige BiH, i to:

1. predstavnik kluba,
2. glavni trener (UEFA 'Pro') licenca
3. prvi pomoćni trener (UEFA 'A' licenca)
4. drugi pomoćni trener (UEFA 'A' licenca)
5. Trener golmana (UEFA 'A' Goalkeeper licenca)
6. igrači,
7. ljekar kluba,
8. fizioterapeut
9. komesar za bezbjednost (obaveza kluba domaćina).

Pored gore navedenih lica, svaki klub može dodatno prijaviti i do 5 (pet) ostalih službenih osoba koje mogu sjediti na klupi ekipe (pomoćni treneri, ljekar, fizioterapeut) koje moraju biti licencirane od strane NS/FS BiH. Ako klupa ekipe ima manje mjesta, preostali broj mjesta mora se smjestiti sa strane svake klupe ekipe.

U pogledu odijevanja lica u tehničkom prostoru obavezno se primjenjuju sljedeći standardi:

1. predstavnik kluba u odijelu (sa kravatom ili ne),
2. glavni trener u odijelu (sa kravatom ili ne), ili treneri kluba,
3. dva pomoćna trenera u treneri kluba,
4. igrači u sportskoj opremi sa markerima,
5. ljekar kluba, odijelo ili trenerka,
6. fizioterapeut u treneri kluba.
7. komesar za bezbjednost u odijelu (sa kravatom ili ne)

U slučaju nepoštovanja navedenih uslova klub snosi disciplinsku odgovornost.

Ukoliko je klub jednu osobu licencirao za obavljanje više dužnosti/ funkcija, ista može obavljati samo jednu od tih dužnosti na utakmici.

Član 10.

Klub domaćin kao organizator utakmice Superkupa dužan je na zahtjev kluba-gosta obezbjediti najmanje 5% ukupnog kapaciteta stadiona isključivo za gostujuće navijače i to u odvojenoj i bezbjednoj zoni. Ukoliko odvojena zona zauzima i više od 5% ukupnog kapaciteta stadiona, gostujućem klubu, odnosno njegovim navijačima, mora se staviti na raspolaganje i ovaj veći broj mjesta.

Gostujući klub dužan je najmanje 48 sati prije utakmice obavijestiti klub domaćin o načinu i organizaciji dolaska većeg broja navijača.

Za neredе ili izgrede koji se dogode u dijelu stadiona koji je rezervisan za gostujuće navijače, gostujući klub ima objektivnu odgovornost te podliježe disciplinskim sankcijama.

Član 11.

Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.

Promocija ili objava, na bilo koji način, političkih poruka ili bilo kojih drugih političkih djelovanja unutar ili u neposrednoj blizini stadiona strogo je zabranjena uoči, tokom ili nakon završetka utakmice.

Član 12.

Klub domaćin obavezan je obezbjediti, za potrebe NS/FS BiH, odgovarajući broj ulaznica i to:

- 20 ulaznica u loži koja ima status najbolje,
- 20 ulaznica na tzv. tribini uz lože,
- 50 ulaznica na nekoj drugoj tribini.

PRAVA IZ TAKMIČENJA I NAGRADE

Član 13.

Pobjednik utakmice postaje pobjednik Superkupa Bosne i Hercegovine.

Nogometni/Fudbalski savez Bosne i Hercegovine pobjedniku Superkupa dodjeljuje pehar u trajno vlasništvo i 65 zlatnih medalja za igrače, tehničko i stručno rukovodstvo kluba pobjednika, a 65 srebrenih medalja za igrače, tehničko i stručno rukovodstvo kluba finaliste.

Zlatne medalje se dodjeljuju službenim licima finalne utakmice.

Ekipe učesnice utakmice finala Superkupa BiH obavezne su pristupiti uručanju priznanja za osvojeni plasman.

Klubovima finalistima pripada novčana nagrada u skladu sa Odlukom koju donese Izvršni Odbor Nogometnog/Fudbalskog saveza Bosne i Hercegovine.

DELEGAT NA UTAKMICI

Član 14.

Delegata na utakmici određuje Komitet sa usvojene liste delegata za takmičarsku sezonu 2025/26.

Ukoliko na utakmicu ne dođe delegirani delegat, njegovu dužnost preuzima posmatrač suđenja na toj utakmici.

Delegat zastupa Komitet i ima vrhovni nadzor na utakmici.

Komitet donosi posebno Upustvo o vršenju dužnosti delegata.

Delegat i sudija su obavezni dostaviti dopunski izvještaj u roku od 24 (dvadesetčetiri) sata po odigravanju utakmice, ukoliko je na utakmici došlo do incidenata, prekida utakmice, isključenja igrača, kao i na zahtjev Komiteta.

Član 15.

Delegat je obavezan da 90 (devedeset) minuta prije početka utakmice održi radni sastanak (brifing) sa predstavnicima klubova, četvrtim sudijom, koordinatorom bezbjednosti NS/FS BiH (ako je određen) komesarom za bezbjednost kluba domaćina i predstavnikom policije.

Kašnjenje na radni sastanak - brifing povlači disciplinsku odgovornost lica i klubova.

KOORDINATOR ZA BEZBJEDNOST

Član 16.

Na utakmicama na kojima je potrebno prisustvo koordinatora za bezbjednost NS/FS BiH, istog određuje Komitet za stadione i bezbjednost NS/FS BiH.

Uloga i obaveze koordinatora za bezbjednost definisane su Uputstvom koje donosi Komitet za stadione i bezbjednost NS/FS BiH.

POSMATRAČ SUĐENJA

Član 17.

Posmatrač suđenja određuje Komitet za sudije i suđenje NS/FS BiH, sa liste posmatrača suđenja WWIN lige BiH za takmičarsku sezonu 2025/26.

Uloga i obaveze posmatrača suđenja su definisane Uputstvom koje donosi Komitet za sudije i suđenje NS/FS BiH.

SUDIJE/SUCI

Član 18.

Utakmicu Superkupa BiH mogu voditi samo sudije sa liste sudija WWIN lige BiH, čije određivanje vrši Komitet za sudije i suđenje NS/FS BiH, u skladu sa odlukom Izvršnog odbora NS/FS BiH.

Član 19.

Na utakmici finala Superkupa BiH, dopuštena je upotreba VAR (Video assistant referee) tehnologije, uz prethodnu ocjenu o opravdanosti upotrebe iste.

Ocjenu o opravdanosti upotrebe VAR (Video assistant referee) tehnologije na utakmici finala Superkupa BiH, prethodno donosi Komitet za sudije i suđenje, i to najkasnije 5 (pet) dana prije dana zakazanog odigravanja utakmice.

DISCIPLINSKE ODREDBE

Član 20.

O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH.

ŽALBE

Član 21.

Žalbe na utakmicu podnose se Komitetu koji ih rješava u prvom stepenu.

Žalbe se po svim osnovama moraju najaviti uz obrazloženje, elektronskim putem, telegramski, e-mailom ili faxom koji ima automatski ispis datuma i vremena o najavi žalbe. Najavu žalbe dostaviti u NS/FS BiH u roku od 24 (dvadesetčetiri) sata po odigranoj utakmici, a pismeno obrazloženje sa dokazom o uplaćenju taksi mora se dostaviti NS/FS BiH u roku od 48 (četrdesetosam) sati po odigranoj utakmici.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi sljedeći radni dan.

Žalba se dostavlja Komitetu putem Službe za takmičenje i suđenje NS/FS BiH.

Uz žalbu se dostavlja dokaz o uplaćenju taksi u skladu sa odlukom IO NS/FS BiH.

FINANSIJSKE ODREDBE

Član 22.

Prihodi od utakmice pripadaju domaćinu utakmice, koji podmiruje i sve troškove organizacije utakmice.

Službenim licima na utakmici pripadaju odgovarajuće naknade, u skladu sa odlukom Izvršnog odbora NS/FS BiH.

OPREMA MOMČADI

Član 23.

Ekipe na jednoj utakmici ne mogu igrati u istim ili sličnim bojama dresova. Ekipe su dužne usaglasiti boje opreme 72 (sedamdesetdva) sata prije zvaničnog termina odigravanja utakmice, u skladu sa prijavljenim osnovnim bojama.

U slučaju podudaranja boja opreme neposredno prije utakmice, dresove će promijeniti domaća ekipa. Ukoliko jedna od ekipa ne poštuje prijavljene boje dresova, ista snosi disciplinsku odgovornost.

MEDIJSKE AKTIVNOSTI

Član 24.

Klub domaćin je obavezan za vrijeme odigravanja utakmice Superkupa BiH obezbijediti u objektu stadiona prostoriju (salu) za održavanje press konferencija, kao i osobu zaduženu za medije (portparola) koja će biti odgovorna za koordinaciju medijskih aktivnosti kluba, neposredne saradnje sa službenim licima i predstavnicima glavnih emitera - vlasnika TV prava, kada to oni zahtjevaju, te aktivnog učešća u organizaciji medijskih aktivnosti u skladu sa ovim propozicijama i drugim važećim aktima NS/FS BiH.

Klub domaćin je obavezan, za vrijeme odigravanja utakmice obezbijediti u objektu stadiona, za potrebe medija i TV sponzora, rezervisan prostor sa internet konekcijom i namještaj koji obuhvata mjesta za komentatore, kao i mjesta za pozicije TV kamera za prenos utakmice vlasnika TV prava.

Klubovi učesnici Superkupa BiH mogu organizovati - održati na zahtjev TV sponzora ili prema ličnoj odluci press konferencije za akreditovane predstavnike medija, prije i nakon završetka utakmice u prostorijama sale za press konferencije ili na drugom prikladnom mjestu na stadionu preko portparola.

Ako se organizuju prije utakmice, press konferencije se mogu organizovati najmanje na 1 (jedan) dan u odnosu na utvrđeni termin početka utakmice i vode ih portparoli klubova, a otvorene su za sve akreditovane medije.

Kada se organizuje press konferencija za medije nakon završetka utakmice, to mora biti učinjeno 15-20 minuta nakon završetka utakmice, a na istoj mogu biti prisutni: glavni treneri (zasebno), i najmanje po dva igrača za davanje izjava na prikladnom mjestu uz prethodnu saglasnost klubova.

Učesnici konferencije za medije (treneri, igrači, zvaničnici klubova) obavezni su se pridržavati kodeksa oblačenja i ponašanja za vrijeme nastupa na press konferenciji.

Također, klub domaćin je dužan da nakon utakmice pripremi i osigura tzv. mixed zonu, a oba kluba imaju obavezu da usmjere igrače da pri izlasku iz svlačionica prođu kroz ovaj prostor. Pristup ovom prostoru, pored igrača i službenih lica klubova, imaju isključivo akreditovani predstavnici medija.

Klubovi su obavezni obezbijediti da glavni trener i ključni igrač budu na raspolaganju za kratki intervju sa glavnim emiterom (vlasnikom TV prava), ako to oni traže. Realizacija se može izvršiti prije, u pauzi ili po završetku utakmice ili službenog treninga, na prikladnom mjestu koji utvrdi portparol kluba i vlasnik TV prava.

Klubovi su obavezni otvoriti svoje treninge na dan prije određenog termina za utakmicu za predstavnike medija u trajanju od najmanje 15 (petnaest) minuta pred početak treninga. Nakon isteka ovog vremena portparol kluba će preduzeti aktivnosti da predstavnici medija napuste prostor za trening.

ZAVRŠNE ODREDBE

Član 25.

Za sva ostala pitanja koja nisu predviđena ovim Propozicijama važe odredbe Pravilnika o nogometnim/fudbalskim takmičenjima NS/FS BiH, Propozicija takmičenja WWIN lige BiH i završnog dijela Kupa BiH, Pravila nogometne/fudbalske igre i drugih propisa NS/FS BiH, FIFA-e i UEFA-e.

Član 26.

Propozicije stupaju na snagu danom objavljivanja na web stranici Saveza, a primjenjuju se za takmičarsku sezonu 2026/27.

P R E D S J E D N I K
Vico Zeljković s.r.